

# Lawatan sulung PM ke Perancis erat hubungan dua hala

BERITA HARIAN 04 JUL 2025

m/s 12

## Anwar dijadual adakan pertemuan dengan Macron di Istana Elysee

**Kuala Lumpur:** Perdana Menteri Datuk Seri Anwar Ibrahim mengadakan lawatan rasmi sulung ke Perancis pada 3 dan 4 Julai ini, atas jemputan Presiden Emmanuel Macron.

Duta Besar Malaysia ke Perancis, Datuk Eldeen Husaini Mohd Hashim, berkata lawatan itu membawa status rasmi sebagai simbol komitmen tinggi Perancis terhadap hubungan diplomatik dengan Malaysia sejak Anwar memegang jawatan Perdana Menteri pada 2022.

"Status lawatan rasmi ini juga memberi makna besar kepada hubungan diplomatik dua hala yang terus diperkukuh," katanya kepada media Malaysia menerusi sidang dalam talian dari Paris, Rabu.

Menurut beliau, Anwar akan disambut oleh barisan kepimpinan tertinggi kerajaan Perancis di lapangan terbang, diikuti kawalan kehormat sebelum menghadiri majlis bersama diaspora Malaysia yang menetap di Perancis.

Anwar dijadual mengadakan pertemuan empat mata bersama Macron di Istana Elysee, dengan agenda utama termasuk perdagangan, pelaburan, tenaga boleh diperbaharui, semikonduktor, pertahanan, pendidikan, ekonomi digital dan kecerdasan buatan (AI).

"Malaysia menjangkakan lawatan rasmi ini akan meningkatkan keyakinan pelabur untuk meneroka peluang pelabur baharu memperkukuh kerjasama ekonomi dua hala, khususnya sektor nuklear dan tenaga bersih," katanya.

### Bincang isu serantau

Selain itu, Malaysia turut menyuarakan sokongan terhadap usaha Perancis menganjurkan persidangan penyelesaian konflik Palestin-Israel dan membincangkan isu serantau seperti Laut China Selatan serta kestabilan Asia Tenggara dalam kapasiti Malaysia selaku Pengerusi ASEAN 2025.

Eldeen berkata, sesi syarahan

umum oleh Perdana Menteri bertajuk *Southeast Asia and Europe: Recalibrating the Terms of Engagement* akan diadakan di Universiti Sorbonne, antara institusi ternama dunia dalam bidang intelektual dan budaya.

"Beliau juga akan menghadiri majlis bersama diaspora Malaysia seramai 250 orang, menyampaikan syarahan umum dan menunaikan solat Jumaat serta mengadakan pertemuan dengan pemimpin komuniti Islam di Masjid Besar Paris, sebuah masjid tertua di Perancis.

"Lawatan ini menyasarkan pembukaan lembaran baharu dalam hubungan dua hala, memacu pertumbuhan ekonomi negara serta meningkatkan daya saing Malaysia dalam rantaian bekalan global," katanya.

Sepanjang lawatan itu, Anwar diiringi Menteri Luar, Datuk Seri Mohamad Hasan; Menteri Pengangkutan, Anthony Loke; Menteri Pertanian dan Keterjaminan Makanan, Datuk Seri Mohamad Sabu; Menteri Perta-

hanan, Datuk Seri Mohamed Khaled Nordin dan Menteri Pelaburan, Perdagangan dan Industri, Tengku Datuk Seri Zafrul Tengku Abdul Aziz serta Timbalan Menteri Peralihan Tenaga dan Transformasi Air, Akmal Nasrullah Mohd Nasir.

Pada 4 Julai, Anwar akan berlepas ke Rio de Janeiro, Brazil bagi menyertai Sidang Kemuncak BRICS. Anwar kini dalam siri lawatan ke tiga negara bermula dari Itali, Perancis dan Brazil, dari 1 Julai hingga 7 Julai.

Perancis adalah rakan dagang keempat terbesar Malaysia dalam kalangan negara Kesatuan Eropah dan juga sumber utama pelaburan langsung asing dalam teknologi tinggi dan sektor strategik.

Pada 2024, jumlah dagangan antara Malaysia dan Perancis telah mencatatkan sebanyak RM15.95 bilion (AS\$3.63 bilion). Bagi tempoh Januari hingga Mei 2025, nilai dagangan adalah sebanyak RM6.26 bilion (AS\$1.49 bilion).

BERNAMA

“Lawatan ini sasarkan pembukaan lembaran baharu dalam hubungan dua hala, memacu pertumbuhan ekonomi negara serta meningkatkan daya saing Malaysia dalam rantaian bekalan global”

Eldeen Husaini Mohd Hashim,  
Duta Besar Malaysia ke Perancis

